

六  
典  
通  
考

六典通考卷七十一

湖西閻鎮珩輯

教典考

奠茶

大司樂凡有道者有德者使教焉死則以爲樂祖祭於瞽宗

禮記祭義祀先賢於西學

西學周小學也

文王世子凡始立學

者必釋奠於先聖先師及行事必以幣

先聖周公若孔子

凡釋奠者

必有合也

國無先聖先師則所釋奠者當與鄰國合也

有國故則否

若唐虞夔龍伯夷周有周

公魯有孔子則各

凡學春官釋奠於其先師秋冬亦如之

官謂

禮樂詩書之官不言夏夏從春可知也釋奠者設薦饌酌奠而已無迎尸以下之事

天子視學乃命有

司行事興秩節祭先師先聖焉有司卒事反命始養之也適

東序釋奠於先老詳見王制出征執有罪反釋奠於學以

訊餼告釋菜奠幣禮先師也詩魯頌矯矯虎臣在泮獻餼疏王制反

以訊餼告

禮書鄭氏曰釋奠者設薦饌酌奠而已無迎尸以下事公

彦曰奠之為言儀禮聘賓歸至於禰薦脯醢觴酒陳陳者

停停饌具而已所以奠之也則釋奠設薦饌酌奠而已可知也特牲饋食

奠解於尸未至之前則釋奠無迎尸可知也古者釋奠或

施於山川或施於廟社或施於學周官大祝反行舍奠甸

祝舍奠於祖廟文王世子凡始立學者必釋奠於先聖先

師山川廟社之祭不止於釋奠學之祭釋奠而已賈公彥

曰非時而祭曰奠此為山川廟社言也學之釋奠有常時

有非時文王世子凡學春官釋奠於其先師秋冬亦如之  
鄭氏曰不言夏夏從可知此常時之釋奠也凡始立學天  
子視學出征執有罪反以訊馘告必釋奠焉此非時之釋  
奠也釋奠之禮有牲幣有合樂有獻酬大祝造於廟宜乎  
社過大山川則用事反則釋奠此告祭也曾子問曰凡告  
必用牲幣文王世子凡始立學釋奠行事必以幣此有牲  
幣之證也文王世子凡釋奠者必有合也此有合樂之證  
也聘禮觴酒陳席於阼薦脯醢三獻一人舉爵獻從者行  
酬乃出此有獻酬之證也然山川廟社之釋奠皆有牲幣  
學之釋奠非始立學不必有幣學之釋奠有合樂則山川  
廟社不必有合也聘禮釋奠有三獻則天子諸侯於山川

廟社不止三獻也鄭注王制謂釋奠禮先師者其說是也

然以王制釋奠為釋菜奠幣以文王世子釋奠者必有合

為與鄰國合孔穎達以學記之釋菜為釋奠其說誤也

大胥春入學舍采合舞采讀為菜始入學必釋菜月令孟

春命樂正入學習舞為仲春仲春上丁命樂正習舞釋菜正

樂官之長也將舞必釋菜於先師天子乃帥三公九卿諸侯

大夫親往視之文王世子始立學者既興器用幣與當為

誤也禮樂之器成則費之又然後釋菜不舞不授器釋菜禮

用幣告先聖先師以器成乃退饋於東序一獻無介語可也謂得立三代之

奠則舞舞學記大學始教皮弁祭菜示敬道也有司服以

於東序皮弁祭菜示敬道也有司服以

弁祭先聖先師以蘋藻之菜也崔氏云著皮弁祭菜蔬並是

質素示學者以謙敬之道矣庶氏以註禮先聖先師之義

解經謂始立學也若學士春始入學惟得祭先師故文王世子云春官釋奠於其先師皇氏謂春時學士始入學恐非

禮書釋菜之禮猶摯也婦見舅姑其摯也棗栗服脩若沒而廟見則釋菜弟子見師其摯也束脩若禮於先師則釋菜大胥舍菜合舞而文王世子釋菜不舞不授器以釋奠既舞故也士喪禮君視斂釋菜入門喪大記大夫士既殯而君往焉釋菜於門內占夢季春乃舍萌於四方舍萌釋也則釋菜之禮豈特子弟之見先師婦之廟見而已哉昏禮有奠菜儀弟子之見先師蓋此類歟鄭氏謂昏禮奠菜蓋用莖入學釋菜蘋藻之屬始立學釋菜芹藻之屬蓋以泮宮有芹藻子事父母有莖萱故有是說菜之爲摯則菜而已采蘋教成之祭毛氏謂牲用魚芼之用蘋藻則詩所

謂湘之者芼之也與釋菜異矣

後漢永平二年三月郡縣道行鄉飲酒禮於學校皆祀聖師  
周公孔子牲以犬

魏正始二年二月帝講論語通五年五月講尚書通七年十

二月講禮記通竝使太常釋奠以太牢祠孔子於辟雍以顏

回配邱濬曰此以顏子配享之始漢以來釋奠之禮始見於此前此祠孔子者皆於闕里至是始行於太學

晉武帝泰始七年皇太子講孝經通咸寧三年講詩太康三

年講禮記通惠帝元康三年皇太子講論語通元帝太興二

年皇太子講論語通太子竝親釋奠以太牢祠孔子以顏回

配成帝咸康元年帝講詩通穆帝升平元年三月帝講孝經

通孝武寧康三年七月帝講孝經通竝釋奠如故事

宋書禮志魏齊

王每講經使太常釋奠先聖先師於辟雍弗躬親焉惠帝明  
帝之爲太子及愍懷太子講經竟並親釋奠於太學太子進  
爵於先師中庶子進爵於顏回成穆孝武三帝亦皆親釋奠  
孝武時以學在水南懸遠有司議依升平元年於中堂權立  
行太學於時無復國子生有司奏應須復二學生百二十人  
太學生取見人六十國子生權銓大臣子孫六十人事訖罷  
奏可釋奠禮畢會百官六品以上

宋元嘉二十二年太子釋奠采晉故事官有其注祭畢太祖  
親臨學宴會太子以下悉預

齊武帝永明三年詔立學創立堂宇有司奏宋元嘉舊事學  
生到先釋奠先聖先師禮又有釋菜未詳今當行何禮用何  
樂及禮器尙書令王儉議周禮春入學舍菜合舞記云始教  
皮弁祭菜示敬道也又云始入學必釋奠先聖先師中朝以  
來釋菜禮廢今之所行釋奠而已金石俎豆皆無明文方之



七廟則輕比之五祀則重陸納車允謂宣尼廟宜依亭侯之  
爵范甯欲依周公之廟用王者儀范宣謂當其爲師則不臣  
之釋奠日宜備帝王禮樂此則車陸失於過輕二范傷於太  
重喻希云若王者自設禮樂則肆賞於致敬之所若欲嘉美  
先師則所況非備尋其此說守附情理皇朝屈尊宏教推以  
師資引同上公卽事惟允元嘉立學裴松之議應儻六佾以  
郊樂未具故權奏登歌今金石已備宜設軒懸之樂六佾之  
舞牲牢器用悉依上公其冬皇太子講孝經通親臨釋奠車  
駕幸聽邱濬曰釋奠用六佾軒懸之樂始此

梁天監八年皇太子釋奠周捨議以爲釋奠仍會太子著絳  
紗褙樂用軒懸預升殿坐者皆服朱衣帝從之又有司以爲

禮云凡爲人子升降不由阼階按今學堂凡有三階愚謂客若降等則從主人之階今先師在堂義所尊敬太子宜登阼階以明從師之義若釋奠事訖宴會之時無復先師之敬太子升堂則宜從西階以明不由阼義吏部郎徐勉議鄭玄云由命士以上父子異宮宮室旣異無不由阼階之禮請釋奠及宴會太子升堂竝宜由東階若輿駕幸學自然中陞陳太建三年皇太子親釋奠於太學二傅祭酒以下賚帛有差後主至德三年皇太子出太學講孝經釋奠於先師禮畢設金石之樂會宴王公卿士

後魏天興四年命樂師入學習舞釋菜於先聖先師肅宗正光元年詔來歲仲陽節和氣潤釋奠孔顏乃其時也有司可

豫繕國學圖飾聖賢置官簡牲擇吉備禮

後齊新立學必釋奠禮先聖先師歲春秋二仲常行其禮每月旦祭酒頒博士以下及國子諸學生以上太學四門博士升堂助教以下太學諸生階下拜孔揖顏日出行事而不至者記之爲一負雨霑服則止學生每十日給假皆以景日放之郡學則於坊內立孔顏廟博士以下亦每月朝云

邱濬曰此後世

朔日行禮之始今朔望行香此其權輿歟

後周天和元年詔諸胄子入學但束脩於師不勞釋奠釋奠者學成之祭自今爲恆式大象二年帝幸露門學行釋奠禮隋制國子寺歲以四仲月上丁釋奠於先聖先師州郡學則以春秋仲月釋奠學生皆乙日試書景日給假焉

唐武德二年始詔國子學立周公孔子廟七年高祖釋奠焉以周公爲先聖孔子配九年封孔子之後爲褒聖侯貞觀二年左僕射房玄齡博士朱子奢建言周公尼父俱聖人然釋奠於學以夫子也大業以前皆孔子爲先聖顏回爲先師乃罷周公升孔子爲先聖以顏回配四年詔州縣學皆作孔子廟十一年詔尊孔子爲宣父作廟於兗州給戶二十以奉之十四年太宗親釋奠於國子學詔祭酒孔穎達講孝經二十一年詔左邱明卜子夏公羊高穀梁赤伏勝高堂生戴聖毛萇孔安國劉向鄭眾賈逵杜子春馬融盧植鄭康成服虔何休王肅王弼杜預范甯二十二人皆以配享而尼父廟學官自祭之祝曰博士某昭告於先聖州縣之釋奠亦以博士祭

中書侍郎許敬宗等奏禮學官釋奠於其先師鄭氏謂詩書禮樂之官也四時之學將習其道故釋奠各以其師而不及先聖惟春秋合樂則天子視學有司總祭先聖先師秦漢釋奠無文魏則以太常行事晉宋以學官主祭且國學樂以軒縣尊俎須於官非臣下所可專也請國學釋奠以祭酒司業博士爲三獻辭稱皇帝謹遣州學以刺史上佐博士三獻縣學以令丞主簿若尉三獻如社祭給明衣會皇太子釋奠自爲初獻以祭酒張後胤亞獻光州刺史攝司業趙弘智終獻永徽中復以周公爲先聖孔子爲先師顏回左邱明以降皆從祀顯慶二年太尉長孫无忌等言禮釋奠於其先師若禮有高堂生樂有制氏詩有毛公書有伏生又禮始立學釋奠

於先聖鄭氏注若周公孔子也故貞觀以孔子爲先聖眾儒爲先師且周公作禮樂當同王者之祀乃以周公配武王而

孔子爲先聖總章元年太子弘釋奠於學贈顏回爲太子少

師曾參少保咸亨元年詔州縣皆營孔子廟景雲二年八月

皇太子釋奠於國學

劉子元傳玄宗在東宮將親釋奠有司草儀注令從臣皆乘馬著衣冠子元議

曰古者自大夫已上皆乘車而以馬爲駢服魏晉迄平隋代朝士又駕牛車按江左官至尚書郎而輒輕乘馬則爲御史

所彈又顏延之罷官後好騎馬出入閭里當代稱其放誕此則專車憑軾可振朝衣單馬御鞍宜從褻服今議者皆云祕

閣有梁武帝南郊圖多有危冠乘馬者臣按此圖是後人所爲非當時所撰又傳稱因俗禮貴緣殷輅周冕規模不一

秦冠漢佩用舍無常況事有不便理資變通其乘馬衣冠竊謂宜從省廢今屬殿下親從齒胄將臨國學輒進狂言用申

鄙見皇太子手令付外宣行編爲常式

開元七年皇太子齒胄於學謁先聖三

獻皆用胄子祀先聖如釋奠十一年春秋二時釋奠諸州用

牲牢屬縣用酒脯十九年天下州縣停牲牢唯用酒脯二十七年詔二京之祭牲太牢樂宮縣舞六佾州縣之牲以少牢而無樂仲春仲秋釋奠於文宣王武成王皆以上丁上戊國學以祭酒司業博士三獻樂官軒懸前享一日奉禮郎設三獻位於東門之內道北執事位於道南皆西向北上學官館官位於縣東當執事西南西向學生位於館官之後皆重行北上觀者位於南門之內道之左右重行北面相對爲首設三獻門外位於東門之外道南執事位於其後每等異位北向西上館官學官位於三獻東南北向西上設先聖神座於廟室內西楹間東向先師於先聖東北南向其餘弟子及二十一賢以次東陳南向西上其餘皆如常祀二十八年詔春

秋二仲上丁以三公攝事若會大祀則用仲丁州縣之祭上

丁

皇太子及刺史縣令釋奠詳具開元禮

上元元年肅宗以歲旱罷中小祀而

文宣之祭至仲秋猶祠之於太學永泰二年八月修國學祠堂成祭酒蕭昕始奏釋奠宰相元載杜鴻漸李抱玉及常參官六軍將軍就觀焉自復二京惟正會之樂用宮縣郊廟之享登歌而已文武二舞亦不能具至是魚朝恩典監事乃奏宮縣於講堂而雜以教坊工伎貞元九年季冬貢舉人謁先師日與親享廟同有司言上丁釋奠與大祠同卽用仲丁乃更用日謁於學元和九年禮部奏貢舉人謁先師自是不復行矣

後唐長興三年太常禮院檢討禮例釋奠文宣王竝中祠例



祭以少牢其配座十哲行釋奠之禮自喪亂以來廢祭四壁英賢今國子博士蔡同文奏文宣王四壁諸英賢各設一豆一爵祀享當司詳郊廟錄文宣王從祀諸座各饗二實以粟黃牛脯豆二實以葵藟鹿醢簠簋各一實以黍稷飯酒爵一禮文所設祭器無一豆一爵之儀敕從之

宋眞宗景德四年同判太常禮院李維言開寶通禮諸州釋奠并刺史致齋三日從祭之官齋於公館祭日刺史爲初獻上佐爲亞獻博士爲終獻今諸州長吏不親行祀非尊師重教之道詔太常禮院檢討以聞按五禮精義州縣釋奠刺史縣令初獻上佐縣丞亞獻州博士縣主簿終獻有故以次官攝之大中祥符三年判國子監孫奭言上丁釋奠舊禮以祭

酒司業博士充三獻官新禮以三公行事近歲止命獻官兩  
員臨事通攝未副崇祀向學之意望自今備差太尉太常光  
祿卿以充三獻又命崇文院刊釋奠儀注及祭器圖頒之諸  
路四年詔太常禮院定州縣釋奠器數先聖先師每酌酒尊  
一籩豆八簋二簋二俎三罍一洗一篚一尊皆加勺羶各置  
於玷巾共二燭二爵共四玷有從祀之處諸坐各籩二豆二  
簋一簋一俎一燭一爵一景祐元年詔釋奠用登歌愛日齋叢鈔歐陽公云釋奠釋菜祭之略者也古者士之見師以菜爲贄故  
始入學者必釋菜以禮其先師其學官四時之祭乃皆釋奠  
釋奠有樂無尸而釋菜無樂則其又略也祭之禮以迎尸酌  
饔爲盛釋奠薦饌直奠而已故曰祭之略者余按周禮注鄭  
司農云舍菜爲舞者皆持芬香之菜或曰古者士見於君以  
雉爲贄見於師以菜爲贄菜直爲蔬食菜羹之菜或曰學者  
皆人君卿大夫之子衣服采飾舍菜者減損解釋盛服以下  
其飾也呂氏春秋注舍猶置也初入學宮必禮先師置采帛

於前以贊神采兩音而異義其說惟議禮之家有以折衷也

熙寧五年國子監言舊例貢

舉歲禮部貢院集諸州府所貢第一人謁奠先聖如春秋釋奠儀請罷之大觀初大司成強淵明言禮經士始入學有釋菜之儀請自今貢士始入辟雍竝以元日釋奠於先聖獻官一員以丞或博士分奠官八員以博士正錄太祝一員以正錄應祀官前一日赴學各宿其次至日常服行禮貢士初入學者陪位於庭他略倣釋奠之儀高宗紹興十年復釋奠文宣王爲大祀用王普請也祀前受誓戒加籩豆十二其禮如社稷又在京爲大祀州縣爲中祀乾道八年宰輔請討論上丁釋奠及太子入學之儀上曰文王世子篇載此甚詳梁克家奏入學以齒則知父子君臣長幼之道虞允文奏事備於

禮經上曰可令有司討論以聞紹熙元年知漳州朱熹條上  
釋奠禮儀狀曰昨準尚書禮部符下政和五禮祭祀儀式其  
間頗有未詳備處今覩進奏官報近者判部侍講侍郎奏請  
編類州縣臣民禮儀鏤版頒降已奉聖旨依奏此誠化民善  
俗之本然熹竊慮其間未詳備處將來奉行或致牴牾今具  
於後一所準行下釋奠禮儀熹按其神位除正配三位外有  
殿上兩廊從祀未見位號名數按祀令二月八月上丁釋奠  
文宣王以充國公鄒國公配牲共用羊一豕一白幣三而已  
今其所祀乃近一百餘位一羊一豕無緣可以遍及又州縣  
廟學窄狹祭器獻官多不及數往往不能一一分獻其爲欺  
慢莫大於斯竊欲更乞相度申明許令州縣免祭兩廊諸位

縣學并免殿上十位庶幾事力相稱儀物周備可以盡其誠

敬熹又按行下釋奠行事儀引三獻官詣舒王神位前一節

係政和間所定後來靖康中已追貶王安石爵秩停罷配亭

今儀注尚仍舊文竊慮州縣奉行反致疑惑亦合申明改正

一所準行下釋奠陳設儀云設著尊四犧尊四爲二重在享

之東南隅北向西上配位卽於正位酌尊之東酌尊在前有坫加勺翬爲

酌尊著尊一實明水爲上尊餘實醴齊亞終獻酌之犧熹按後

章行事儀云初獻酌犧尊之泛齊亞終獻酌象尊之醴齊與

此不協竊疑兩處必有一誤尋考祭社稷祀風雨雷師陳設

儀皆設犧尊象尊爲酌尊乃知正是此章之誤其著字當作

犧字犧字當作象字又旣云北向則是犧尊在北象尊在南

所云在前亦是重複倒置欲乞申明改正行下一所準行下

釋奠祭祀陳設章皆云又設太尊二山尊二在神位前太尊一實

泛齊山尊一實醴齊著尊二犧尊二象尊二壺尊六著尊一實盞齊

各以一尊實明水犧尊一實醴齊象尊一實沈齊各以一尊實明水壺尊三實

元酒三實二酒明水元酒皆在上五齊三酒皆以木處酒充在殿下皆北向西上加羈五齊三酒皆設而不酌熹按此太

尊山尊乃是共設於殿之前楹壇之南面其北更容獻官拜

跪酌獻非是逐位之前各設四尊所謂北向者恐是太尊二

爲一行其南山尊二爲一行又次南階下著尊二爲一行又

次南犧尊二爲一行又次南象尊二爲一行又次南壺尊六

爲三行其南向者反此所謂西上者謂西實元酒東實五齊三酒其東

上者反此各乞討論并賜行下朱子語類古人神位皆西坐東向故獻官皆西向拜若宣聖廟室則

先聖東向先師南向今一皆南向拜時卻望西拜都自相背  
古者用籩豆簠簋等陳於地當時席地而坐故飲食爲便今  
夫子像設置椅上又置在臺座上春秋釋奠乃陳籩豆簠  
於地是甚義理釋奠據開元禮臨時設位後來有塑像顏孟  
配享始亦分位於先聖左右後來并坐於先聖之東西向孔  
子居中顏孟當列東坐西向七十二人先是排東廡三十六  
人丁卻方自西頭排起自升曾子於殿上下面趨一位次序  
都亂了又云開寶禮全錄開元禮若政和五禮則甚錯今釋  
奠有伯魚而無子思又十哲亦皆差互且仲弓反在上紹興  
中作七十二子贊只據唐爵號不知後來已加封矣孟子配  
享乃荆公請之論傳道合以顏子曾子子思孟子配

遼太祖神冊四年八月丁酉謁孔子廟道宗靖寧六年六月  
丙寅中京置國子監命以時祭先聖先師

金大定十四年國子監言春秋上丁釋奠於文宣王本監造  
茶食等物以大小櫟排設用畱守司樂以樂工爲禮生率倉  
場等官陪禮於古禮未合京師首善之地四方觀仰行禮次

序合行詳定又孟子以燕服在後堂宣聖像側還虛一位宜遷孟子像於宣聖右與顏子對改塑冠冕法服如舊禮官定釋奠儀數文宣王兗國公鄒國公每位籩豆各十犧尊一象尊一簠簋各二俎二奏版各一皆設案七十二賢二十一先儒每位各籩一豆一爵一兩廡各設象尊二總用籩豆各二百二十三簠簋各六俎六犧尊三象尊七爵九十四其尊皆玷罍二洗二篚勺各二彝六正位并從祀藉尊罍俎豆席約用三十幅尊席用葦俎豆席用莞牲用羊豕各三酒二十瓶禮行三獻以祭酒司業博士充分獻官二讀祝官一太官令一捧祝官二罍洗官一爵洗官一巾篚官二禮直官十二學生以儒服陪位樂用登歌大樂令一員本署官充樂工三十



九人明昌三年定釋奠三獻官以祭酒司業博士充祝詞稱  
皇帝謹遣及登歌改用太常樂工其獻官執事與享者並法  
服陪位學官公服學生儒服有司奏增修曲阜宣聖廟畢敕  
黨懷英撰碑文朕將親行釋奠其檢故事以聞承安二年春  
丁章宗親祀以親王攝亞終獻皇族陪祀文武羣臣助奠上  
親爲贊文舊封公者升國公侯者爲國侯廊國以下皆封侯  
宣宗遷汴建廟會朝門內歲祀如儀宣聖顏孟羊豕各一餘  
同小祀用羊八無豕諸州釋奠遵唐儀

元中統二年詔宣聖廟有司歲時致祭月朔釋奠八月丁酉  
命開平守臣釋奠於宣聖廟至元元年始行宣聖釋奠禮十  
年三月中書省命春秋釋奠執事官各公服如其品陪位諸

信襴衫唐巾行禮成宗詔曲阜陵廟上都大都諸路府州縣

廟學書院瞻學土地及貢士莊以供春秋二丁朔望祭祀自

是天下廟學無不完葺釋奠如舊儀大德初敕到任先謁先

聖廟著爲令

此後世到任謁廟之始

十年京師文宣王廟成行釋奠禮

牲用太牢樂用登歌製法服三襲命翰林院定樂名樂章至

大二年定制春秋釋奠用太牢延祐三年秋七月詔春秋釋

奠於先聖以顏子曾子子思孟子配享六年二月朔日食改

釋奠於中丁天祿二年賜鳳翔府岐陽書院額書院祀周文

憲王命學官春秋釋奠如孔子廟儀

凡有司致祭先代聖君名臣皆有姓無樂秋

七月遣使以上尊腊羊鈔十錠至大都國子監助仲秋上丁

釋奠祭版三各一尺二寸廣八寸木用楸梓柏幣三用絹各

長一文八尺牲用牛一羊五豕五以犧尊實泛齊象尊實醴  
齊皆三有上尊加罍有杓設堂上太尊實泛齊山罍實醴齊  
有上尊著尊實盞齊犧尊實醴齊象尊實沈齊壺尊實三酒  
皆有上尊設堂下盥洗位在阼階之東以象尊實醴齊有上  
尊加罍有勺設於兩廡近北盥洗位在階近南簋十豆十  
簋二簋二登三鉶三俎三有毛血豆正配位同籩豆皆二簋  
一簋一俎一從祀皆同凡銅之器六百八十有一宣和爵站  
一豆二百四十有八簋簋各一百十有五登六犧尊象尊各  
六山尊二壺尊六著尊太尊各二罍二洗二龍杓二十有七  
站二十有八爵一百十有八竹木之器三百八十有四籩二  
百四十有八筐三俎百三十有三陶器三瓶二香鑪一簋巾

二百四十有八簠簋巾二百四十有八俎巾百三十有三黃巾蒙單十

明制歲春秋上丁皇帝降香遣官祀於國學丞相初獻翰林學士亞獻國子祭酒終獻先期皇帝齋戒獻官陪祀執事官皆散齋二日致齋一日前祀一日皇帝服皮弁服御奉天殿降香至日獻官行禮四年禮部奏定儀物制簠豆爲十簠用竹簠簋登鉶及豆用瓷牲易以熟樂生六十人舞生四十八人引舞二人凡百一十人禮部請選京民之秀者充樂舞生太祖曰樂舞乃學者事況釋奠所以崇師宜擇國子生及公卿子弟在學者豫教肄之

是年進士釋褐詣國學行釋菜禮

六年定祀先師

樂章迎神咸和之曲奠帛寧和之曲初獻安和之曲亞獻景

和之曲徹饌咸和之曲送神咸和之曲十七年敕月朔望祭  
酒以下行釋菜禮郡縣長以下詣學行香二十六年頒大成  
樂器牲用牛一山羊五豕九鹿一兔五設正壇犢一羊一豕  
一登一鉶二籩豆各十簠簋各二帛一白色設酒尊三爵三  
篚一於壇東南西向祝文案一於壇西四配位各羊一豕一  
登一鉶二籩豆各十簠簋各一爵三帛一篚一十哲位東五  
壇豕一分五帛一篚一爵三鉶各一籩豆各四簠簋各一酒  
盞一西五壇同東廡十三壇共豕一帛一篚一爵一每壇籩  
豆各四簠簋各一酒盞四西廡十三壇同贊引引獻官盥洗  
揖笏出笏就位典儀唱迎神奏樂樂止贊四拜通贊陪祭官  
同典儀唱行初獻禮奉樂執事官捧帛爵詣各神位前贊引

導遣官贊詣大成至聖文宣王神位前贊拊笏贊獻帛執事以帛進奠訖執事以爵進贊引贊獻爵出笏贊詣讀祝位樂暫止跪傳贊眾官皆跪讀祝官取祝跪於獻官左讀訖俛伏興詣兗國復聖公神位前拊笏獻爵出笏詣廊國宗聖公沂國述聖公鄒國亞聖公各神位前儀竝同復位樂止行亞獻終獻禮奏樂執事以爵獻於神位前樂止典儀唱飲福受胙執事以爵進贊飲福酒執事以胙進贊受胙出笏俛伏興復位兩拜奏樂執事各詣神位前徹饌樂止送神奏樂四拜讀祝官捧祝掌祭官捧帛饌各詣瘞位典儀唱望瘞奏樂樂止贊禮分獻以翰林院修撰國子博士等官各二員典儀唱分獻官陪祭官各二拜讀祝訖唱分獻官盥洗拊笏出笏升壇

詣神位前拈笏俱如前禮執事以帛進分獻官奠訖又以爵進獻訖出笏復位亞獻終獻望瘞各如前禮永樂元年八月遣官釋奠改稱國子監孔子廟尋建新廟於故址廟南向東西兩廡丹墀西墀所正南廟門門東宰牲亭神廚西爲神庫持敬門門正南爲外門殿名大成景泰六年準奏以兩廡祭品儉薄增豕四隻棗栗各五十斤黍稷各一斗形鹽五十斤南京國子監同成化十二年從祭酒周洪謨言增樂舞爲八佾籩豆各十二二十二年二月朔當釋菜值上丁令以次日釋菜嘉靖九年令南京國子監祭用十籩十豆樂舞各止六佾凡六品以下不陪祭者先日赴廟瞻拜其內臣降香亦罷十年釐正祀典服皮弁謁廟用特牲奠帛行釋奠禮迎神送

神各再拜樂三奏文舞六佾配享從祀及啟聖祠分奠用酒  
脯亦遣官致祭於南監及闕里從大學士張璁議也聖師之  
祭始於世宗皇師伏羲氏神農氏軒轅氏帝師陶唐氏有虞  
氏王師夏禹王商湯王周文王武王九聖南向左周公右孔  
子東西向歲春秋開講前一日皇帝服皮弁拜跪行釋奠禮  
用羹酒果脯帛祭於文華殿東室初東室有釋象帝以其不  
經撤之乃祀先聖先師自爲祭文行奉安神位禮輔臣禮卿  
及講官俟行禮訖入拜先是洪武初司業宋濂建議欲以建  
安熊氏之說以伏羲爲道統之宗神農黃帝堯舜禹湯文武  
以次列焉秩祀天子之學太祖不從至是世宗倣其意行之  
十六年移祀於永明殿後行禮如初其後常遣官代祭隆慶



初仍於文華殿東室行禮前一日太常博士捧祝版於文華殿上填御名捧出正祭日早太常寺進豆祝帛陳設每位銅一盞豆各二禮神制帛一白色一上著皮弁服由文華殿出內贊對引官導上就御拜位內贊導上至伏義前揖圭上香詣各神位前俱上香出圭復位再拜讀祝官啟祝跪上跪贊讀祝訖俛伏興讀祝官安祝退贊焚祝帛上退拜位之東立捧祝帛官出門禮畢上出還宮

論曰秦漢以來禮文殘缺奠菜之儀久曠不行至魏正始之間始以牲牢祀孔子其後齊梁諸儒稍復考訂典章以爲一王之則唐開元禮倣儀禮饋食篇節文最稱詳備故吾朱子獨有取焉其知潭州日嘗條上禮儀數事竟格不下身沒之後郡邑倣而行之然能通其義者尠矣元儒張顏推本朱子之說撰闕里釋奠儀注其書久佚於代好古之士徒深慕歎而已顏之言曰象設非

古也開元禮猶云設席是無象也高臺巍坐而席地之禮不可見帶劍秦漢冠服之節也開元禮朝會猶有解劍之席冕服挾劍未之有聞二者之失所從來久矣神位西坐東向尸位也配位東坐西向主人位也自尸禮廢禮家謂自內出者無匹不行自外至者無主不止故立神以配而爲主焉開元以後遷神位南面配位猶故也進顏孟南向參列如浮圖老子宮者孔氏祖庭廣記謂金大定十四年所行何所稽乎楹間兩階五齊三酒以四代之器爲備物之享也列數瓦缶果爲何說尸尊不就洗禮也登罍爵於牀洗者以尸尊自居犧象不錯諸地主人遂不坐實爵簡亦甚矣幣之未薦置諸神位

之左示不敢褻陳之階起與主人俱升則不嚴矣蓋事  
由草創未之暇備由顏之言觀之不可謂非篤古而達  
於禮者故粗採次其說存著於篇以俟後有君子折衷  
焉

### 書數

上古結繩而治後世聖人易之以書契百官以治萬民  
以察之明決取諸夫之意黃帝之史蒼頡見鳥獸蹏迒之迹  
知分理之可相別異也初造書契百官以乂萬品以察  
蒼頡之初作書蓋依類象形故謂之文其後形聲相益  
卽謂之字字者言孳乳而浸多也著於竹帛謂之書書  
者如也以迄五帝三王之世改易殊體封於泰山者七

十有二代靡有同焉周禮八歲入小學保氏教國子先以六書一曰指事指事者視而可識察而可見上下是也二曰象形象形者書成其物隨體詰詘日月是也三曰諧聲諧聲者以事爲名取譬相成江河是也四曰會意會意者比類合誼以見指撝武信是也五曰轉注轉注者建類一首同意相受考老是也六曰假借假借者本無其字依聲託事令長是也及宣王太史籀著大篆十五篇與古文或異至孔子書六經左邱明述春秋傳皆以古文厥意可得而說其後諸侯力政不統于王惡禮樂之害已而皆去其典籍分爲七國田疇異晦車涂異軌律令異法衣冠異制言語異聲文字異形秦始皇

帝初兼天下丞相李斯乃奏同之罷其不與秦文合者  
斯作倉頡篇中車府令趙高作爰歷篇太史令胡毋敬  
作博學篇皆取史籀大篆或頗省改所謂小篆者也是  
時秦焚滅經書滌除舊典大發隸卒興役戍官府職務  
繁初有隸書以趣約易而古文由此絕矣

大司徒以鄉三物教萬民而實興之三日六藝禮樂射御書  
數保氏養國子以道乃教之六藝五曰六書六曰九數

內則十年就外傅居宿於外學書計外傳教學之師也小史掌邦

國之志鄭司農云志猶記也春秋傳所謂周志國語所謂鄭書之屬是也史官主書故韓宣子聘於魯觀書太史

外史掌四方之志志猶記也謂若魯之春秋晉之乘楚之檮杌也掌三皇五帝

之書楚靈王所謂三墳五典掌達書名於四方謂若堯典禹貢達此名使知之或曰古曰名今

曰字使四方知書之文字得能讀之

大行人王之所以撫邦國諸侯者九歲

屬瞽史諭書名

書名書之字也古曰名聘禮曰百名以上

非天子不考文文書名

今天下書同文

九數一方田以御田疇界域二粟布以御

交質變易三衰分以御貴賤稟稅四少廣以御積羣方圓五

商功以御功程積實六均輸以御遠近勞費七盈朒以御隱

雜互見八方程以御雜糅正員九句股以御高深廣遠九章算術

漢以六體試學童課最者以爲尙書御史吏民上書字或不

正輒舉劾元始五年徵天下通知逸經古記天文歷算鍾律

小學史篇方術本草及以五經論語孝經爾雅教授者在所

爲駕一封軺傳遺詣京師至者數千人

唐書學博士二人

代本蒼頡作書周禮保氏敎以六藝其五曰六書古謂之小學漢書食貨志曰八歲

人小學學六甲五方書計之事晉衛恆字勢曰昔黃帝有沮  
誦蒼頡始作書契蓋觀鳥跡以興思也秦纂古文有八體一  
曰大篆二曰小篆三曰刻符四曰蟲書五曰摹印六曰署書  
七曰殳書八曰隸書王莽時甄豐校文字復有六書一曰古  
文二曰奇字三曰篆書四曰佐書五曰繆篆六曰掌教文武官  
日鳥書自漢以來不見其職隋置書學博士掌教文武官  
八品已下及庶人子之爲生者以石經說文字林爲專業餘  
字書亦兼習之石經三體書限三年業成說文二年字林一  
年其束脩之禮督課試舉如三館博士之法算學博士二人  
代本隸首造數周禮保氏敎以六藝其六曰九數卽九章也  
漢書律歷志曰數者一十百千萬所以算數事物也人學則  
是職在太史義和掌之魏晉以來多掌教文武官八品以下  
在史官不列於國學隋置算學博士掌教文武官八品以下  
及庶人子之爲生者二分其經以爲之業習九章海島孫子  
五曹張邱建夏侯陽周髀十有五人習綴術緝古十有五人  
其記遺三等數亦兼習之孫子五曹共限一年業成九章海

其三年張邱建夏侯陽各一年周髀五經算共一年綴術  
四年緝古一年其束脩之禮督課試舉如三館博士之法

宋崇寧三年始建算學生員二百一十人爲額其業以九章  
周髀及假設疑數爲算問仍兼海島孫子五曹張邱建夏侯  
陽算法并厯數三式天文書爲本科本科外人占一小經願  
占大經者聽公私試三舍法略如太學上舍三等推恩以通  
仕登仕將仕郎爲次大觀四年以算學生歸太史局併書學  
生入翰林書藝局容齋隨筆大觀中置算學如庠序之制以  
文宣王爲先師充鄒荆三國公配饗十哲  
從祀而列自昔著名算數之人繪像於兩廊賜五等爵中書  
舍人張邦昌定其名風后大撓隸首容成箕子商高常儀鬼  
史區巫咸九大封公史蘇卜徒父卜偃梓慎卜楚邱史趙史  
墨神龜榮方甘德石申鮮于妄人耿壽昌夏侯勝京房翟奉  
李尋張衡周興單颺樊英郭璞何承天宋景業蕭吉臨孝恭  
張恭張曾元王樸二十八人封伯鄧平劉洪管輅趙達祖沖



之殷紹信都芳許遵耿詢劉焯劉炫傅仁均王孝通羅季  
李淳風王希明李鼎祚邊岡郎顗襄楷二十人封子司馬季  
主洛下閭嚴君平劉歆姜岌張邱建夏侯  
陽甄鸞盧太翼九人封男以黃帝爲先師紹興初命太史局  
試補淳熙元年聚局生子弟試厯算崇明宣明大衍厯三經  
取其通習者五年以紀元厯試九年以統元厯試十四年用  
崇天紀元統元厯三歲一試紹熙二年命銓太史局試應三  
全通一粗通合格者並特收取嘉定四年命局生試中方轉  
補淳祐十二年祕書省言舊典太史局隸祕省今引試局生  
不經祕書非也諸局官應試厯算天文三式官每歲附試通  
等以精熟爲上精熟等以習他書多爲上習書等以占事有  
驗爲上諸局生補及二年以上者並許就試一年試厯算一  
科一年試天文三式兩科每科取一人請同知算造官闕有

試翰林天文官闕有試諸靈臺郎有應試補直長者諸正名  
學生有試問景祐新書者諸判局闕而合差諸科漏官五年  
而轉資者無不屬於祕書而局官等人各置腳色遇有差遣  
改補功過之類竝申祕書今乃一切自行陳請殊乖初意自  
今有違令補差及不經祕書公試補中者中書執奏改正仍  
從舊制申嚴試法從之書學生習篆隸草三體明說文字說  
爾雅大雅方言兼通論語孟子義願占大經者聽篆以古文  
大小二篆爲法隸以二王歐虞顏柳眞行爲法草以章草張  
芝九體爲法考書之等以方圓肥瘦適中鋒藏畫勁氣清韻  
古老而不俗爲上方而有圓筆圓而有方意瘦而不枯肥而  
不濁各得一體者爲中方而不能圓肥而不能瘦模倣古人

筆畫不得其意而均齊可觀爲下其三舍補試升降略同算學唯推恩降一等自初置及併罷年數悉同算學

金大定四年頒行女直大小字所譯經書每謀克選二人習之尋欲興女直字學校猛安謀克內多擇良家子爲生諸路

至三千人九年選異等百人薦於京師廩給之命溫迪罕締

達教以古書作詩策

進上曰契丹文字年遠當時何不立契丹

漢字深奧丞相守道曰漢文字初亦未必能如此由歷代聖

賢漸加修舉也聖主明哲令譯經教天下行之久亦可同漢

人文明昌五年言者謂葉魯谷神二賢勅置女直文字乞贈

名爲建立祠廟令女直漢人諸生隨拜孔子之後拜之禮官

言前代無勅置文字入孔子廟故事可於廟後或左右置祠

令諸儒就拜乃令依蒼頡立廟整屋例官爲立廟於上京納

里渾莊歲時致祭

元至元二十六年尙書省臣言伊斯題費文字宜施於用今翰林院伊普迪哈魯鼎能通其字學乞授以學士之職凡公卿大夫與夫富民之子皆依漢人入學之制日肄習之帝可其奏是歲置回回國子學

明洪武二十五年令儒學生員兼習射與書算俟科貢兼考之後廢不行宣德四年北京國子監助教王仙言近年生員止記誦文字以備科貢其於字學算法略不曉習改入國監歷事諸司字畫粗拙算學不通何以居官蒞政乞令天下儒學生員兼習書算從之

顧炎武曰生員冒濫之弊至今日而極求其省記四書本

經全文百中無一更求通曉六書字合正體者千中無一也簡汰之法請分爲二場第一場令暗寫四書一千字經一千字脫誤本文及字不遵式者貼出除名第二場乃考其文義則變相之射僅有存者矣或曰此末節也豈足爲才士累夫周官敎國子以六藝射御之後繼以六書而漢世試書九千字以上乃得爲史以周官童子之課而責之成人漢世掾史之長而求之秀士猶且不能則退之隴畝其何辭之有北齊策孝秀於朝堂對字有脫誤者呼起立席後書迹濫劣者飲墨水一升文理孟浪者奪席脫容刀備劉之君尙立此制以全盛之朝求才之主而不思除弊之方課實之效與天下因循於溷濁之中以是爲順人情

而已

論曰書數者六藝之末技小學之一端先王設是以爲  
教非曰致知格物之功盡是也以爲區區小數吏胥之  
所能商賈之所習知之不過爲偏長薄技不知不害爲  
通儒君子傳曰雖小道必有可觀者焉致遠恐泥是以  
君子不爲也自唐設科舉始有書算之目專置博士以  
掌之明初亦嘗用此以造士然浸廢不行惟宋崇寧大  
觀之間置翰林書藝局用舍人張邦昌議祀黃帝爲先  
師而配以風后容成以下七十二人各加五等封爵之  
號其褒崇九數之學可謂盛矣及金虜入寇汴社爲墟  
當時算學諸生未聞有一人一策可以效同仇敵愾之

用者故國家之盛衰視乎人主之好尙好尙正則禮教  
明而人心厚忠義之氣勃然莫遏好尙不正則巧僞邪  
辟之徒羣起而攫取富貴至於禍難卒發曾無人以施  
其補救宋靖康之事是也

通考卷七十二

湖西閣鎮珩輯

敘典考

歷代國學

鴻都學

四門學

漢高祖平定四海未遑庠序之事武帝時董仲舒對策曰養士之大者莫大庠太學太學者賢士之所關教化之本原願陛下興太學置明師以養天下之士帝立學校之官皆自仲舒發之

三輔黃圖太學在長安西北七里

元朔五年制曰蓋聞導民以禮風

之以樂婚姻者居室之大倫也今禮廢樂崩朕甚愍焉故詳延天下方聞之士咸登諸朝其令禮官勸學講議洽聞舉遺興禮以爲天下先太常臧博士平等議曰聞三代之道鄉里



有敎夏曰校殷曰序周曰庠其勸善也顯之朝廷其懲惡也加之刑罰故敎化之行也建首善自京師始由內及外今陛下昭至德開大明配天地本人倫勸學興禮崇化厲賢以風四方太平之原也古者政敎未洽不備其禮請因舊官而興焉爲博士官置弟子五十人復其身太常擇民年十八以上儀狀端正者補博士弟子郡國縣官有好文學敬長上肅政敎順鄉里出入不悖所聞令相長丞上屬所二千石二千石謹察可者常與計偕詣太常得受業如弟子一歲皆輒課能通一藝以上補文學掌故闕其高第可以爲郎中太常籍奏卽有秀才異等輒以名聞其不事學若下材及不能通一藝輒罷之而請諸能稱者臣謹按詔書律令下者明天人分際

通古今之誼文章爾雅訓辭深厚恩施甚美小吏淺聞弗能  
究宣亡以明布諭下以治禮掌故以文學禮義爲官遷留滯  
請選擇其秩比二百石以上及吏百石通一藝以上補左右  
內史大行卒史比百石以下補郡太守卒史皆各二人邊郡  
一人先用誦多者不足擇掌故以補中二千石屬文學掌故  
補郡屬備員請著功令他如律令制曰可自此公卿大夫士  
吏彬彬多文學之士矣昭帝時舉賢良文學增博士弟子員  
滿百人宣帝末增倍之元帝好儒能通一經者皆復數年以  
用度不足更爲設員千人郡國置五經百石卒史成帝末或  
言孔子布衣養徒三千人今天下太學弟子少於是增弟子  
員三千人歲餘復如故平帝時王莽秉政增元士之子得受

業如弟子勿以爲員歲課甲科四十人爲郎中乙科二十人

爲太子舍人丙科四十人補文學掌故云

儒林傳武帝立五經博士開弟子員

設科射策訖於元始一經說至百餘萬言大師眾至千餘人

初成帝時犍爲郡於水濱得

古磬十六枚劉向因是說上宜興辟雍設庠序陳禮樂隆雅

頌之聲盛揖讓之容以風化天下成帝以向言下公卿議會

向病卒丞相大司空奏請立辟雍按行長安城南營表未作

遭成帝崩羣臣引以定諡及王莽爲宰衡欲耀眾庶遂興辟

雍徐天麟曰三輔黃圖漢辟雍在長安西北七里元始五年

雍河間獻王來朝獻雅樂武帝對之三雍宮卽此劉歆孔永孫遷平晏四人使治明堂辟雍得萬國歡心封侯

各千戶

後漢建武五年十月營起太學

在洛陽城南開陽門外去宮八里講堂長十丈廣三丈堂

前石經  
四部

七年朱浮上書曰陛下尊敬先聖垂意古典建太學

立橫舍比日車駕親臨觀饗將以宏時雍之化顯勉進之功

也尋博士之官爲天下宗師使孔聖之言傳而不絕舊事策

試博士必廣求詳選博舉明經唯賢是登伏聞詔書更試五

人唯取見在洛陽城者臣恐求之密邇容或未盡而四方之

學無所勸樂凡策試之本貴得其真非有期會不及遠方也

又諸所召試私自發遣非有傷費煩擾之事也帝皆然之中

元元年初建三雍

漢官儀辟雍去明堂三百步車駕從北門入三月九月於中行鄉射禮

永平

九年爲四姓小侯立學校置五經師四姓樊氏郭氏陰氏馬

氏諸子弟以非列侯故曰小侯

元初六年鄧太后詔和帝弟濟北王河間王子男女年五

歲以上四十餘人又鄧氏近親子孫三十餘人並爲開邸第教學經書躬自監試幼者使置師保

永元十四

年司空徐防上疏漢立博士十有四家設甲乙之科勸勉學者臣以爲博士及甲乙策試宜從其家章句開五十難以試之

語在賓興篇

永建六年翟酺上言孝文皇帝始置一經博士武

帝大合天下之書而孝宣論六經於石渠學者滋盛弟子萬數光武初興起太學博士舍內外講堂明帝時辟雍成欲毀太學太尉趙意以爲太學辟雍宜兼存而頃者頽廢至爲園採芻牧之處宜更修繕誘進後學帝從之九月繕起太學開拓房室學者爲酺立碑銘於學云左雄奏召海內名儒爲博士使公卿子弟爲諸生

語在賓興篇

本初元年令郡國舉明經年

五十以上七十以下詣太學自大將軍至六百石皆遣子受業歲滿課試高第五人補郎中次五太子舍人又千石六百

石四府掾屬三署郎四姓小侯先能通經者各令隨家法其

高第者上名牒以次賞進

延熹五年太學西門自壞襄楷建上疏建言文德將喪教化廢也

和初詔諸生年十六以上比郡國明經試高第十五人上第  
十六人爲郎中第十七人爲太子舍人下第十七人爲王家  
郎永壽二年課試諸生補郎舍人後復制學生滿二歲試通  
二經者補文學掌故其不能二經者復隨輩試之通二經者  
亦得爲文學掌故其已爲文學掌故者滿二歲試能通三經  
者擢高第爲太子舍人其不得第者後復隨輩試第復高者  
亦得爲太子舍人已爲太子舍人滿二歲試能通四經者推  
高第爲郎中其不得第者後復隨輩試第復高者亦得爲郎  
中滿二歲試能通五經者推高第補吏隨才而用其不得第

者後復隨輩試第復高者亦得補吏光和元年始置鴻都門

學生

鴻都門名於內置學

初帝好學自造義皇篇五十章引諸生能爲

文賦及工書篆者久遂至數十人侍中祭酒樂松賈護多引

無行趣勢之徒並待制鴻都門下喜陳方俗閭里小事帝悅

之待以不次之位蔡邕上封事曰古者取士必使諸侯歲貢

孝武之世郡舉孝廉又有賢良文學之選於是名臣輩出文

武並興夫書畫辭賦才之小者匡國理政未有其能陛下卽

位之初先涉經術聽政餘日觀省篇章聊以游意當代博奕

非以教化取士之本而諸競利作者鼎沸其高者頗引經訓

風喻之言下則連偶俗語有類俳優或竊成文虛冒名氏臣

每受詔於盛化門差次錄第其未及者亦復隨輩皆見拜擢

既加之恩難復收改但守俸祿於義已宏不可復使理人及  
仕州郡帝不聽勅州郡三公舉用辟召或出爲刺史太守入  
爲尙書侍中有封侯賜爵者君子恥與爲列焉范蔚宗曰光  
武中興愛好經術未及下車而先訪儒雅採求闕文補綴漏  
逸先是四方學士多懷挾圖書遁迹林藪自是莫不抱負墳  
策雲會京師范升陳元鄭興杜林衛宏劉昆桓榮之徒繼踵  
而集於是立五經博士及以家法教授易有施孟梁丘京氏  
尙書歐陽大小夏侯詩齊魯韓毛禮大小戴春秋嚴顏凡十  
四博士太常差次總領焉建武五年乃修起太學稽式古典  
籩豆干戚之容備之於列服方領習矩步者委它其中明帝  
爲功臣子孫別立學校搜選高能以授其業自期門羽林之



士悉令通孝經章句匈奴亦遣子入學建初中會諸儒於白虎觀考詳同異肅宗親臨稱制如石渠故事顧命使臣著爲通義又詔高才生受古文尙書毛詩穀梁左氏春秋皆擢高第爲講郎給事近署所以網羅逸遺博存衆家孝和亦數幸東觀覽閱書林及鄧后稱制學者頗懈時樊準徐防竝陳勸學之宜又言儒職多非其人於是制詔公卿妙簡其選三署郎能通經術皆得察舉自安帝覽政薄於藝文博士倚席不講朋徒相視怠散學舍頽敝鞠爲園蔬牧兒競豎至於芻刈其下順帝感翟酺之言乃更修黌宇凡所造構二百四十房千八百五十室試明經下第補弟子增甲乙之科郡國耆儒皆補郎舍人本初元年梁太后詔曰大將軍下至六百石悉

遣子就學每歲輒於鄉射月一饗會之以此爲常自是游學  
增盛至三萬餘生然章句漸疏而多以浮華相尚儒者之風  
蓋衰矣黨人旣誅其高名善士多坐流廢後遂至忿爭更相  
告言亦有私行金貨定蘭臺漆書經字以合其私文熹平四  
年靈帝乃詔諸儒正定五經刊於石分爲古文篆隸三體書  
法以相參檢立之學門使天下咸取則焉

魏黃初五年立太學制五經課試之法備學士員錄依漢甲  
乙以考課州郡有欲學者皆遣詣太學弟子至數百人太和  
中諸生千數而諸博士皆粗疏無以教弟子弟子本亦避役  
竟無能習學冬來春去歲歲如是正始中劉靖上疏曰自立  
太學二十餘年而寡有成者由博士選輕諸生避役高門子

弟恥非其倫故太學雖有其名而無其人雖設其敎而無其功高選博士取行堪人表經任人師者掌敎國子使二千石以上子孫年從十五皆入太學明制黜涉其經明行修者進之以崇德荒敎廢業者退之以懲惡浮華交游不禁自息矣

吳孫休永安元年置學官立五經博士嚴取應選加其寵祿一歲課試差其品第加位賞

晉太始八年有司奏太學生七千餘人才任四品聽畱詔已

試經者畱之餘遣還郡國大臣子弟堪受敎者入學咸寧二

年起國子學周禮所謂國子受敎於師氏者也置祭酒博士

各一人助教十五人博士取履行清淳通明典義者若散騎

常侍中書侍郎太子中庶子以上乃得召試

國子學之名始此東漢立五經

博士以一人爲祭酒陳元爲司空南閤祭酒晉公府掾屬設東閤西閤軍諮祭酒而國子學亦設之唐以後惟國子監有

祭酒諸曹不設是官

太康五年修明堂辟廱靈臺江左咸康三年從國

子祭酒袁瓌太常馮懷之請立太學徵生徒而士大夫尙老莊儒術終不振太元初立行太學時無復國子生置太學生六十人國子生權銓大臣子孫六十人事訖罷九年尙書謝石請興國學以訓胄子頒下州郡普修鄉校烈宗納其言選公卿二千石子弟爲生增造房屋百五十五間而品課無章君子恥與其列國子祭酒殷茂言舊制國學生皆冠族華胄比列皇儲而選者混雜蘭艾人情恥之詔褻納竟不施行宋高祖受命詔有司立學未就而崩太祖元嘉二十年復立國子學廢帝雅好藝文使丹陽尹廬江何尚之立元學太子率更令何承天立史學司徒參軍謝元立文學散騎常侍雷

次宗立儒學爲四學

司馬光曰史者儒之一端文者儒之餘事至老莊虛無固非所以爲教也夫學

者所以求道天下無二道安有四學哉

齊建元四年詔立國學置學生百五十人其有位樂入者五

十人生年十五以上二十以還取王公以下子孫悉取家去

都二千里爲限以張緒爲太常卿領國子祭酒

齊高卽位求直言崔祖思

以爲人不學則不知道逆亂所由生宜開文武二學依方習業優殊者待以不次此國學所以置歟張緒風流以爲有正

始之風善清言而已當時以爲極選是春西學秋以國哀罷

永明三年詔立學創立堂宇

召公卿子弟下及員外郎之嗣凡置生二百二十人其年秋

中悉集以王儉領國子祭酒于儉宅開學士館以四部書充

之十日一選學監試諸生東昏侯卽位尙書符依永明舊事

廢學國子助教曹思文上表曰昔漢成立學爰洎元始百餘

年中未嘗暫廢其間有國諱也且晉武之崩其學猶存斯皆  
先代不以國諱而廢學永明以無太子故廢斯非古典今之  
國學卽古之太學天子入國學以行禮太子入國學以齒讓  
晉世乃殊其士庶異其貴賤耳然貴賤士庶皆須教成故國  
學太學兩存之非有太子故立也今學非惟不宜廢宜更崇  
尙其道使郡縣有學鄉閭立教請付尙書及二學詳議有司  
奏從之學竟不立

梁國學置祭酒博士助教太學博士八人天監四年置五經

博士各一人舊國子學生限以貴賤欲招來後進五館生皆

引寒門雋才不限人數

胡寅曰武帝雅好儒術四館養士數千人射策通明者除吏又修孔子廟

幸國子監親臨講肄且令皇太子及王侯之子皆入學可謂勤矣然儒風不振人才不出何也帝心尙佛特以美名興學

養士故人不從其令而從其意其後綱維不立人紀放廢國破身殞爲萬世笑蓋始於此

陳高祖創業日不暇給弗遑勸課世祖以降稍置學官雖博延生徒成業蓋寡

後魏天興二年五經羣書各置博士增國子太學生員三千人四年集博士儒生比眾經文字義類相從凡四萬餘字號曰眾文經太宗時改國子爲中書學立教授博士太平眞君五年詔曰軍國多事未宣文教非所以整齊風俗示軌則於天下也今制自王公下至卿士其子息皆詣太學百工伎巧騶卒子息當習其業不聽立學校始光三年別立太學於城東太和中改中書學爲國子學建明堂辟雍又開皇子之學及遷都洛陽立國子太學四門小學正始二年詔曰古之哲王崇建膠庠

開訓國胄昭宣三禮崇明四術自皇基徙構光宅中區軍國  
務殷未遑經建可敕有司依漢魏舊章營繕國學四年詔置  
國子及太學立小學於四門劉芳上疏曰洛陽記國子學與  
天子對太學在開陽門外古者國學在內太學在外如洛陽  
記猶有彷彿象今宮闕府寺僉復故址國學準舊應在宮門之  
左至如太學基所炳在仍舊營構又云太和十二年勅立四  
門博士於四門置學臣按自周已上學唯以二或尙西或尙  
東或貴在國或貴在郊爰及周室學蓋有六師氏居內太學  
在國四小在郊禮記云周人養庶老於虞庠虞庠在國之西  
郊禮又云天子設四學當入學而太子齒注云四學周四郊  
之虞庠也按鄭注學記周則六學內則設師保以敎使國子



學焉外則有太學庠序之官漢魏以降無復四郊謹尋先旨  
宜在四門按王肅注云天子四郊有學去王都五十里考之  
鄭氏不云遠近今太學故坊基址寬曠四郊別置相去遼闊  
計太學坊竝作四門猶有太廣以臣愚量同處無嫌上從之  
時天下承平學業大盛燕齊趙魏之間橫經著錄不可勝數  
大者千餘人小者猶數百延昌元年詔曰遷京嵩洛年將二  
紀虎幃缺唱演之音四門絕講誦之業博士端然虛祿歲祀  
蠲游之胄歎同子矜可嚴敕有司國子學今冬使成大學四  
門明年暮春令就李平修節太學簡試通儒以充博士選五  
郡聰敏者以教之圖孔子七十二子於堂  
親爲立正光三年始置國子生三十六人李崇表曰今國子  
贊焉  
無教授之實以臣愚量宜罷諸事役非急者三時農隙修此  
數條使辟雍之禮蔚爾而復興誦誦之音煥然而更作道發

明令重遵鄉飲敦進郡學精課經業如此則元愷可得之一  
於上序游夏可致之於下國靈太后省表赦有司議經始  
後齊國子寺掌訓教胄子祭酒領博士五助教十學生七十  
二人太學博士十助教二十學生二百人四門學博士助教  
各二十人學生三百人齊氏太學徒有虛名唯國子一學生  
徒數十胄子以通經進仕者博陵崔子發廣平宋游卿而已  
後周天和元年詔諸胄子入學但束修於師不勞釋奠釋奠  
者學成之祭保定三年四月幸太學大象二年二月幸露門  
學

隋國子寺祭酒一人博士國子太學四門各五人書算各二  
人助教國子太學四門各五人書算各二人學生國子百四  
十人太學四門各三百六十人書算四十人算八十人仁壽元

年詔天下學校生徒多而不精唯簡留國子學生七十人太

學四門及州縣學並廢又改國子爲大學葉適曰當時國子

千萬人史臣以爲其暮年精華稍竭致然時方遣六使巡省

風俗而詔以爲徒有名錄空度歲時未有德爲代範才任國

用良由設學之理多而未精至三年詔令州縣搜揚賢哲則

云雖求傳巖未見幽人徒想崆峒未聞至道唯恐商歌於長

夜抱關於夷門旨意懇切且限以三旬咸令進路徵召將送

必須以禮則所謂精華將竭者亦未必然蓋其心實謂空設學

校未足以得人耳古之爲教使材者必由學舜周公之論是

也漢以後傳經師章句而已材者由於學則枉以壞不材者

由於學則擢以成教之無本而不行取之雖煬帝卽位國子

驟而不獲則學之盛衰興廢蓋未易言也

監加置司業一人丞三人國子學置博士助教各一學生無

常員太學博士助教各二學生五百人帝開庠序徵辟儒生

遠近畢至使相與講論得失於東都納言定其差次以奏聞

唐國子祭酒司業掌儒學訓導之政令六學一曰國子二曰

太學三曰四門四曰律學五曰書學六曰算學國子生三百人以三品已上子孫若從二品已上曾孫及勳官二品縣公京官四品帶三品勳封之子爲之太學生五百人以五品已上子孫職事官五品期親若三品曾孫及勳官三品已上有封之子爲之四門學生千三百人其五百人以勳官三品已上無封四品有封及文武七品以上子爲之八百人以庶人之俊異者爲之律學生五十人書算學生各三十人以八品已下子及庶人之通其事者爲之國子監生尙書省補祭酒統焉皇帝視學皇太子齒冑則執經講義焉釋奠日則集諸生執經論議奏請京文武七品已上清官竝與觀焉凡教授之經以周易尙書周禮儀禮禮記毛詩春秋左氏傳公羊傳

穀梁傳各為一經孝經論語老子學者兼習之諸教授正業周易鄭玄王

彌注尚書孔安國鄭玄注三禮毛詩鄭玄注左傳服虔杜預注公羊何休注穀梁范甯注論語鄭玄何晏注孝經老子並

開元御注其禮記左傳為大經毛詩周禮儀禮為中經周易尚書公羊穀梁為小經歲終考其學官訓

導功業之多少而為之殿最國子丞掌判監事凡六學生有

業成上於監者以其業與司業祭酒試之明經帖經口試策

經義進士帖一中經試雜文策時務徵事其明法明書算亦

各試所習業登第者白祭酒上於尚書禮部其試法皆依考功又加以口試

明經帖限通八已上明法明書皆通九已上主簿句檢監事凡六學生有不率師

教者則舉而免之其頻三年下第九年在學及律生六年無

成者亦如之假遠程限及作樂雜戲亦同唯彈琴習射不禁博士掌教文武官三品

以上及國公子孫二品已上曾孫之為生者五分其經以為

之業習周禮儀禮禮記毛詩春秋左氏傳每經各六十人餘  
經亦兼習之習孝經論語限一年業成尙書春秋公羊穀梁  
各一年半周易毛詩周禮儀禮各二年禮記左氏春秋各三  
年其生初入置束帛一筐酒一壺脩一案號爲束脩之禮其  
習經有暇者令習隸書并國語說文字林三蒼爾雅每旬前  
一日則試其所習業試讀者每千言內試一帖試講者每二  
千言內問義一條總試三條通一及全  
不通對每歲其生有能通兩經以上求出仕者則上於監堪  
秀才進士者亦如之助教掌佐博士分經以教授焉凡館二  
門下省有弘文館生三十人東宮有崇文館生二十人以皇  
總麻以上親皇太后皇大功以上親宰相及散官一品功臣  
身食實封者京官職事從三品中書黃門侍郎之子爲之凡

博士助教分經授諸生未終經者無易業凡生限年十四已上十九已下律學十八已上二十五已下歲終通一年之業口問十義大條通八以上六爲中五爲下併三下與在學九歲律生六歲不堪貢者罷歸諸學生通二經俊士通三經已及第而願畱者四門學生補太學太學生補國子學歲五月有田假九月有授衣假二百里外給程其不帥教及歲中違程滿三十日事故百日緣親病二百日皆罷歸旣罷歸條其狀下之屬所五品已上子孫送兵部准蔭配色每歲仲冬州縣館監送其成者送之尙書省武德元年詔皇族及功臣子孫於祕書外省立小學貞觀中門下置弘文館東宮置崇文館增創學舍千二百間國學太學四門亦增生員博士凡三

百六十員其屯營飛騎亦給博士授經高麗百濟新羅吐蕃  
諸國酋長亦遣子弟入學國學內八千餘人近古未有龍朔  
二年東都置國子監明年以書學隸蘭臺算學隸祕閣律學  
隸詳刑上元二年國子監置大成二十人取已及第者爲之  
試書日誦千言試策所業十通七補其祿俸同直官通四經  
業成吏部試之登第加一階放選不第習業如初三歲又試  
三試不中第從常調武后時鳳閣舍人韋嗣立上言自永淳  
以來國學廢散時輕儒學之官莫存章句之選陛下誠能廣  
開庠序大敦學校三館生徒令追集王公以下子弟不容別  
求仕進皆入國學尊尙儒師則四海之內靡然向風矣神龍  
二年勅學生在學各以長幼爲序初入學皆行束脩之禮國



子太學各絹三匹四門學絹二匹俊士及麻書算學州縣各絹一匹皆有酒醕其束脩三分入博士二分助教又國子監所管學生國子監試州縣學生當州試並選藝業優長者爲試官監試容齋隨筆唐世士人多工書蓋在六館時以爲常義不特銓選之時方取楷書適美者也開元禮載皇子束脩束帛一筐五匹酒一壺二斗脩一案三脰執筐者以筐授皇子皇子跪奠筐再拜博士答再拜皇子還避遂進跪取筐博士受幣皇子拜訖乃出其儀如此縣學生亦然詔宗室三等以下五等以上願宿衛及任國子生聽之其學業成而堪貴者宗正寺試送監舉如常法三衛番下日願入學者聽附國子學太學及律館習業蕃王及可汗子孫願入學者附國子學讀書開元七年令崇文弘文國子生季一朝參又勅州縣學生八品子若庶人入四門學爲俊士及諸州貢舉

不第願入學者聽詳郡國篇十一年置麗正書院聚文學之士或

脩書或侍講有司供給優厚中書舍人陸堅以為無益靡費

欲悉罷之張說曰天子延禮文儒發揮典籍所益大所損微

陸子之言何不達也上重說而薄堅帝愛鄭虔之材置廣文館以虔為博士久之雨

懷庶舍有司不復修完廣德二年詔戎車屢駕諸生輟講宜

追學生在館習業度支給廚米舊所為國子祭酒建崇太學以樹教本詔羣臣有籍於朝

及神策六軍子弟肄業者聽補生員以魚朝恩判國子監事中書舍人常袞言

成均之任當用名儒不宜以宦者領之不聽命宰相已下送

朝恩上馬廷鸞曰釋奠講經宰相帥常參官武臣率六軍大

諸將往聽未為失也而魚朝恩判監事則非也大

庠初歸崇敬為國子司業皇太子欲臨國學崇敬以學與官

名皆不正乃建議古天子學曰辟雍在禮為澤宮前世或曰

璧池或曰璧沼亦言學省漢光武立三廳宮晉武帝臨辟雍  
行鄉飲酒禮別立國子學以殊士庶永嘉南遷惟有國子學  
隋大業中更名國子監今請以國子監爲辟雍省祭酒司業  
之名非學官所宜業者枸箴大板今學不敘樂於義無當請  
以祭酒爲太師氏位三品司業爲左師右師位四品按日知錄  
之詩曰虞業爲樞卽此業字傳曰業大板也所以飾枸爲縣  
也捷業如鋸齒或白畫之爾雅大板謂之業左氏昭九年傳  
辰在子卯謂之疾日君徹宴樂學人近世明經不課其義先  
舍業禮記檀弓大功廢業並謂此也取其帖經傳授義絕請以禮左氏春秋爲大經周官儀禮毛  
詩爲中經尙書周易爲小經各置博士公羊穀梁春秋准一  
中經通置博士博士兼通孝經論語依章疏講解德行淳潔  
文詞雅正形容端重可爲師表者委四品以上各舉所知在

外給傳七十者安車蒲輪敦遣國子太學四門三館各立五經博士學生謁師費用服脩一束酒一壺衫布一裁色如師所服師出中門延入與坐割脩斟酒三爵止乃發篋出經摠衣前請師爲說經大略然後就室朝晡請益師二時堂上訓授道義示以文行忠信孝弟睦友旬省月試時考歲貢廕生徒及第多少爲博士考課上下有不率教者櫝楚之國子移禮部爲太學生太學又不變徙之四門四門不變徙本州之學復不變徭役如初終身不齒雖率教九年學不成者亦歸之本州詔百官議皆以省禁非外司所宜名周官世職稱氏國學非世官不得名辟雍省太師氏無施行者元和二年置東都監生百員自天寶後學校益廢生徒流散永泰中雖置

西監生而館無定員至是始定西京國子館生八十人太學  
七十人四門三百人廣文六十人律館二十人書算館各十  
人東都國子館十人太學十五人四門五十人廣文律館各  
十人書館三人算館二人韓愈疏曰今請國子館并依六典  
人充如有資蔭不補學生應舉者請禮部不在收試限請牒  
送法司科罪緣今年舉期已近伏請去上都五百里內特賜  
非時收補其五百里外且任鄉貢至來年春一時收補其廚  
糧度支先給二百五十四人今請准新補人數量加支給又  
諭新注學官牒近年吏部所注多循資敘不考藝能至今生  
徒不自勸勵伏請非專通經傳博涉墳史及進士五經諸色  
登科人必加以研試然後放上新授官太和七年赦節文應公卿士族

子弟取來年正月以後不先入國學習業者不在明經進士  
之限會昌五年制公卿百官子弟及京畿內士人寄客修明  
經進士業者並隸名太學外州寄士人並隸名所在官學咸通

年禮部侍郎劉允章建言羣臣輪光學錢治  
庠序宰相五萬節度使四萬刺史萬詔可

論曰自漢武興太學世祖建三雍兩京人才蔚焉稱盛  
其後徒眾日繁辨難鋒起破文碎義往往出乎其中是  
時六藝之學雖云章明而黨同伐異各私意見門戶之  
習潛爲厲階至李膺范滂郭林宗之徒柄持清議詆訐  
朝政權幸怒而疾之黨錮之禍由此興焉昔戰國失道  
處士橫議流及始皇遂有焚書坑儒之變漢之黨獄衣  
冠羅其荼毒宗社爲之震蕩雖曰桓靈不君亦諸生激  
之使然也自魏迄隋四百餘載貴老莊崇虛無佛氏怪  
誕之說因而盛行中國庠序雖設空名僅存隋文帝病  
士之浮冗也於是嚴加澄汰其簡擇而獲畱者十不能

一二煬帝好文俗趨侈豔華而不實其教術無足稱也  
唐興設六館儲士太學諸生多至數千百人及貞元中  
柳宗元爲書議之曰論者謂太學生聚爲朋曹侮老慢  
賢有墮窳敗業而利口食者有崇飾惡言而肆鬪訟者  
有凌傲長上而誶罵有司者其退然自克特殊於眾人  
者無幾耳而尙書左丞賈至奏議亦云忠信陵頽恥尙  
失所未學馳騁儒道不舉四者皆取士之失也嗟乎仁  
義之道薄其流必至於狂誕躁競之路開其歸不免爲  
亂賊自唐迄今同斯一轍有天下者誠思風俗爲端理  
之本而以教化爲之先庶乎德行修而賢才出矣

後唐天成三年中書門下奏祭酒之資歷朝所貴爰從近代

不重此官望令宰臣兼判國子祭酒勅令宰臣崔協兼判其  
年協奏請國子監祇置監生二百員候解送至滿數爲定又  
請太學生不得便取公牒輒免本戶差役每年於二百人數  
內不繫時節有投名者先令學官考試收補勅依五年國子  
監奏舊制初補監生束脩錢二千及第後光學錢一千今後  
應色舉人及第後並先於監司出給光學文抄納光學錢等  
凡補監生須令於監中修學則得給牒收補仍據所業次第  
逐季考試中奏如收補年深未聞藝業虛沽補牒不赴試期  
亦委監司具姓名申奏馬端臨曰五季弊法宰相有光省錢  
御史有光臺錢至監生亦令出光學  
錢貧士何所從出既徵其錢復不蠲其役待士之意薄矣然  
史所言多有未曾授業輒取解送者亂離之際學者亦皆苟  
賤冒濫之士焉耳



宋制國子生以京朝七品以上子孫爲之二百人爲額太學生以八品以下子弟若庶人之俊異者爲之開寶八年國子監上言生徒舊七十人分習五經然繫籍者或久不至而在京進士諸科常赴講席肄業請以補闕從之景德間許升朝官嫡親附國學取解而遠鄉人寓京師文藝可稱有本鄉命官保任監官驗之亦聽附學慶厯四年天章閣侍講王洙言國子監廣文太學律學三館學生多至千餘就試試已則生徒散歸講官倚席居常聽講者一二十人耳迺限在學滿五百日已嘗充貢者止百日本授官會具實京朝官保任始預秋試凡入學授業月旦卽親書到歷遇私故或疾告歸甯皆給假違程及期月不來參者去其籍後諫官余靖言非便遂

聽讀日限

馬端臨曰漢人補博士弟子員只限通一經而授之官唐人之法尙如此至宋立三舍不過試

之以浮靡之文誘之以利祿之途然明經而通一藝試文而歷三舍皆非旦暮可就故爲士者內恥於習業之法雖有講肄於榮途之可慕坐學之日不容不久今慶厯之法雖有講肄聽讀而未嘗限以通經之歲月止於拔解赴省而未嘗別有優異之捷徑此所以不能強其久畱反以淹滯爲困也

皇祐末胡瑗爲國子監講書專

管句太學其初人未甚信乃使其徒盛僑顧臨輩分治其事

又令孫覺說孟子士稍稍從之一日升堂講易音韻高朗指

意明白眾方大服瑗在學時每公私試罷掌儀率諸生會於

首善令雅樂歌詩乙夜乃散諸齋亦自歌詩奏琴瑟之聲瑗

在湖學教法最備始建太學有司請下湖學取瑗之法以爲

太學法神宗增太學生員

慶厯中內舍生二百至是增置一千尋詔九百人爲額

又建

講書堂四自主判官至直講總爲十員二員共講一經委中

書選差生員釐爲三等初入外舍外舍升內舍內舍升上舍上舍員百內舍二百外舍不限員月考試學業優等上中書其正錄學諭以上舍生爲之經各二員學行卓異者主判直講復保上中書審察除官八年頒王安石詩書周禮義於學大學安惇等已升上舍特免元豐二年頒學令太學八十齋解其自發解者免禮部試齋三十人外舍生二千月私試歲公試補內舍生間歲一試補上舍生彌封謄錄如貢舉法而上舍試則學官不與考校公試外舍生入一二等升內舍內舍試入優平二等升上舍上舍三等俱優爲上一優一平爲中俱平一優一否爲下上等命以官中等免禮部試下等免解學正五人學錄十人學制所言國子監國子名而實未嘗敎養國子乃詔許清要

官親戚入監爲國子生聽讀額二百人開封府解額歸諸太

學其國子生解額以太學分數取之毋過四十人司業朱服

言四方試禮部者雖不籍太學或有顯過若造飛語謗朝政

許監官以聞用學規殿罰蘇嘉言變法事忤介甫學官并坐其罪今又立飛語謗朝政之條則

太學之設乃箝制羅織之具耳元祐七年置廣文館解額先是開封解額稍

優四方士多冒畿縣戶以試隸太學不及一年者亦往往冒

戶禮部按舊制先補中廣文館生乃得執牒詣國子監驗試

十人取一開封考取亦如其數試者不及千人以率減取嚴

禁重試紹聖元年國子監奏罷廣文館發解凡學生自外路

參假及新補中未撥填入學者權附國子監別號試取一次

元祐置廣文館生以待游士試京師者額二千四百人其解額二百四十所謂十人取一也監察御史上

言先帝立三舍法以歲月稽其行實故入上舍而中上等等者不經禮部試特命以官誘掖激勸莫善於此宜復元豐法以廣樂育又請三學補外舍生一歲四試詔推恩上等注官者歲毋過二人免禮部試者每舉五人免解試者二十人升補等法悉行舊制崇寧三年詔取士悉由學校歲試上舍差知舉如禮部試五年著令大學改用歲試春季太學辟雍生公試同院混取五百七十四人以四十七人爲上等百四十人中等百八十七人下等上等上舍生暨特舉孝弟行能之士不待廷試卽引見釋褐上舍先以試文卷進得可乃引賜若上舍該釋褐而貢在廷試前一年者須在學及半年不犯上二等罰乃得注官重和元年詔太學辟雍各置內經道德經

莊子列子博士二員宣和七年詔內經等書並罷治建炎初  
詔卽駐蹕所置國子監博士二以隨駕三十六人爲監生紹  
興十三年建太學置祭酒司業博士正錄上舍生三十內舍  
生戶部舍生五百七十諸州學滿一年三試中選不犯第三  
等以上罰或兩預釋翼及齒於鄉飲酒者聽充弟子員春秋  
兩試歲一補俄又詔三年一試增至千員中選者給綾紙贊  
詞外舍有月校而公試人等曰內舍內舍有月校而舍試人  
等曰上舍升上舍者直赴廷對二十七年定春季放補省試  
年改用孟夏孝宗時清要官期親許牒子弟補國子別號考  
校如太學赴公私試科舉則混試焉自中興四方士有本貫  
在學公據皆得就補帝始加限諸路以解試終場人數爲準

其薦貢不盡者百取六人赴太學謂之待補生紹熙中趙汝愚奏曰奔競之風勝忠信之俗微榮辱升沈不由學校德行道藝取決糊名視庠序如傳舍目師儒如路人季考月書盡成文具臣請重教官之選假守貳之權倣舍法以育才因大比而取士考終場之數定所貢之員期以次年試於太學庶幾士修實行不事虛文舊制內舍分優平二等優等再赴試兩優釋褐命以京秩除學官至是令先注職官代還注職事官舊校定歲額五六分爲優選者增爲十分矣

胡野雜記太學上舍生就

化原堂釋褐號釋褐狀元例補承事郎太學正錄淳熙初鄭自明由此選不四年爲著作郎補郡六年劉堯夫復以解褐除國子正時王仲行爲兵部尙書奏言今兩優釋褐初授京秩卽授學官視狀元制科恩數過之乞先與外任張商卿亦言今中上舍爲學官不數年便可作監司郡守獄訟財賦非所素習豈能保其不謬乞先注職官上然之詔與殿試第二

例恩慶元嘉定中兩行混補增外舍生爲千四百員內舍校

定不係上舍試年分以八分爲優等又以國子生僞濫命行

在職事官期親釐務官子孫乃得試補又詔待補百人取三

舊法外舍升內舍公試合格乃升補至是歲終取外舍生最

優者一人升內舍葉適曰本朝建學久不克就至王安石乃

間於學者旋爲大官宣和靖康所用誤朝之臣大抵學校之

名士及諸生伏闕撻鼓以請起李綱天下或以爲有忠義士

之氣而朝廷以爲倡亂動眾者毋如太學之士及秦檜爲相

務使諸生爲無廉恥以媚已而以小利啗之陰以拒塞言者

士人靡然成風獻頌拜表希望恩澤一有不及謗議喧然故

至於今太學尤弊遂爲姑息之地蓋其本爲之法月書季考

校定分數以爲終身之利害而其外又以勢利招來之是宜

道其卓然成德者朝咸淳中幸太學推恩三學有差及皇太

后上尊號又加恩在齋生員初慶厯三年立四門學自八品



至庶人子弟充學生歲一試補不中式者仍聽讀三試不中  
出之未幾學廢哲宗置在京小學曰就傅初筮兩齋政和四  
年小學近千人分十齋自八歲至十二歲以誦經書字多少  
差次補內舍若能文從博士試本經小經義稍通補內舍優  
補上舍崇寧元年命將作少監李誠營建外學爲辟雍蔡京  
奏古者國內外皆有學周成均在邦中而黨庠遂序在國外  
今太學專處上舍內舍而外學則處外舍生太學上舍百人  
內舍二百今貢士盛集欲增上舍二百人內舍六百外舍三  
千外學四講堂百齋齋五楹一齋容三十人土初貢至入外  
學經試補入上內舍太學外舍亦令出外學學成奏行之國  
子祭酒總治學事外學官屬司業丞各一稍減太學博士正

錄歸外學學士充學諭者十人直學二人俟貢士至爲之置  
諸王宮大小教授立考選法凡貢入辟雍外舍三試不與外  
補兩試不入等仍犯上三等罰者削籍再赴本州名退送卽  
內舍已降而又試不與或兩犯上四等罰者亦退送太學外  
舍已預考察者許再試以中否爲留遣宣和三年詔辟雍以  
下諸學官屬並罷紹興十四年建宗學於臨安學生百員太  
學五十人小學四十人職事各五人置諸王宮大小學教授  
在學者皆南宮北宅子孫若親賢宅近屬則別選館職教授  
嘉定九年諸王宮學改宗學隸宗正寺教授改博士宗諭  
朱子學校貢舉私議曰學校之選實有道德之人使爲學  
官以來實學之士裁減解額舍選謬濫之恩以塞利誘之

塗蓋古之太學主於教人而因以取士故士之來者爲義而不爲利且以本朝之事言之如李薦所記元祐侍講呂希哲之言曰仁宗之時太學之法寬簡國子先生必求天下賢士真可爲人師者就其中又擇其尤賢者如胡翼之之徒使專教道規矩之事故當是時天下之士不遠萬里來悅師之其游太學者端爲道藝稱弟子者中心悅而誠服之蓋猶有古法之遺意也熙寧以來此法浸壞所謂太學者但爲聲利之場而掌其教事者不過取其善爲科舉之文而嘗得俊於場屋者耳士之有志於義理者旣無求於學其奔趨輻湊而來者不過爲解額之濫舍選之私而已師生相視漠然如行路之人間相與言亦未嘗開之以

德行道藝之實而月書季考者又祇以促其嗜利苟得冒昧無恥之心殊非國家之所以立學教人之本意也欲革其弊莫若一遵仁皇之制擇士之有道德可爲人師者以爲學官而久其任使之講明道藝以教訓其學者而又痛減解額之濫以還諸州罷去舍選之法而使爲之師者考察諸州所解德行之士與諸生之賢者而特命以官則太學之教不爲虛設而彼懷利干進之流自無所爲至矣如此則待補之法固可罷去而復補者又必使與諸州科舉同日引試則彼有鄉舉之可望者自不復來而不患其紛冗矣至於取人之數則又嚴爲之額而許其補中之人從上幾分特赴省試則其舍鄉舉而來赴補者亦不爲甚失

職矣其計會監試漕試附試之類亦當痛減分數嚴予告  
賞以絕其冒濫其熟州教官亦以德人充而責以教道之  
實則州縣之學亦稍知義理之教而不但爲科舉之學矣  
金天德三年始置國子監後定制詞賦經義生百人小學生  
百人年十五以上入學不及十五入小學大定六年置太學  
定五品以上官兄弟子孫百五十人得府薦及終場人二百  
五十人凡試補學生太學禮部主之得府薦及終場舉人皆  
免試易用王弼韓康伯註書用孔安國詩用毛萇鄭箋春秋左氏傳用杜預禮記用孔疏周禮用鄭註賈疏論語用何註邢疏孟子用趙註孫奭疏孝經用唐玄宗註史記前漢後漢書三國志晉書宋書齊書梁書陳書後魏書北齊書周書隋書新舊唐書新舊五代史老子荀子楊子皆自國子監印之授諸學校凡學生會課三日作  
策論又三日作賦及詩三月一私試以季月初先試賦開一

日試策論中選者上五名申部病則給假省親遠行則給程  
犯學規者罰不率教者黜遭喪百日後求入學者不得與釋  
奠凡國子學生三年不能充貢欲就諸局承應者學官試能  
粗通大小各一經者聽

大定十三年設  
女直國子學

元太宗以馮志常爲國子學總敎命侍臣子弟十八人入學  
至元七年命侍臣子弟十一人入學長者四人從許衡童子  
七人從王恂二十四年立國子學設博士通掌學事分敎三  
齋三助敎同掌學事而專守一齋正錄申明規矩督課業凡  
書先孝經小學論語孟子大學中庸次詩書禮記周禮春秋  
易博士助敎親授句讀音訓正錄以次傳習之次日抽籤令  
諸生復說其功課對屬詩章經解史評則博士出題生  
員具稿先呈助敎俟博士既定錄附課簿以憑考校生員  
二百人許衡著入學雜儀及日用節自大德八年定國子生

蒙古色目漢人三歲各貢一人尋命生員二百三年各貢二人至大四年立國學試貢法蒙古官六品色目正七品漢人從七品延祐二年增生員百人陪堂生二十人用趙孟頫元明善議更定國學課法六齋下曰游藝依仁誦書講說小學屬對者隸焉中曰據德志道講說四書課肄詩律者隸焉上曰時習日新講易詩書春秋科習明經義者隸焉季考以次遞升漢人驗上齋蒙古色目驗中齋坐齋二歲以上未犯過者許充試三歲已上許充貢舉漢人私試孟月試經疑仲月試經義季月試策問表章詔誥內科蒙古色目人孟春月試明經季月試策問詞理俱優者上等準一分理優詞平者中等準半分歲終計其年積至八分以上者陞高等四十名爲

額內蒙古色目各十漢人二十歲終試貢有分同闕少者以  
坐齋月日先後爲定私試積分生員有不事課業及違戾規  
矩者初犯罰一分再犯二分三犯除名補高等生員違戾規  
矩者初犯殿試一年再犯除名學正錄糾舉之漢生三年不  
能通一經及不勤學者勒出學明代六堂積分之法取諸此  
然法實始於宋咸淳中外舍  
生晏秦亨以七分三釐乙理爲第三優不許  
今後及八分者方許歲校三名所謂積分也泰定三年更積  
分爲貢舉依世祖舊制而防閑稍嚴密焉伴讀初二十人歲  
貢二人後定四十  
人歲貢六人延祐二年歲貢八  
人充部令使四人路教授四人蒙古國子學至元八年立選  
官員子弟俊秀者入學以通鑑節要用蒙古語言譯寫教之  
俟習學成效出題試問精通者量授官職大德十年增生員  
廩膳六十員至大二年定伴讀四十人以在籍上名生員學



優者補延祐二年蒙古五十人色目二十漢人三十而百官子弟就學者二三百人乃減庶民子弟百十四員聽陪堂學業其生員紙札筆墨歲二次給之回回國子學至元二十六年置延祐元年置監官以其文字便於關防取會數目令依舊制領教泰定二年入學生員五十餘人助教一人廩膳並給之學建在國都百司庶府譯史皆從本學取充焉英宗初罷之